

## Cabaran bahasa Melayu sebagai bahasa kebangsaan?

Dewan Bandaraya Kuala Lumpur pernah memberi tempoh 14 hari turunkan papan iklan tulisan Cina di sebuah premis restoran, baru-baru ini.



**BULAN** Oktober yang lalu merupakan bulan bahasa kebangsaan. Walaupun Oktober telah melabuhkan tirainya, namun usaha memartabatkan bahasa kebangsaan harus sentiasa diteruskan dan ia bukan hanya giat dijalankan pada bulan itu sahaja.

Perdana Menteri, Datuk Seri Anwar Ibrahim sebelum ini ada menyatakan bahawa golongan elit terlalu mengutamakan bahasa Inggeris sehingga mengabaikan bahasa Melayu sebagai bahasa kebangsaan.

Menurutnya, kemahiran berkomunikasi dalam bahasa Inggeris seharusnya tidak dijadikan alasan untuk mengabaikan bahasa ibunda kita. Ini menciptakan ketidakseimbangan dalam usaha untuk meningkatkan status bahasa Melayu jika bahasa tersebut tidak diterima dengan baik oleh golongan profesional.

Misalnya, dalam industri swasta dan profesional, kita mempunyai sektor korporat serta teknologi. Bahasa Inggeris kerap digunakan dalam sektor swasta, terutama di syarikat multinasional atau korporat antarabangsa sebagai bahasa utama untuk berkomunikasi.

Banyak syarikat swasta memberi penekanan pada kepentingan kemahiran bahasa Inggeris dalam mesyuarat, penyampaian maklumat dan penulisan dokumen rasmi. Kehadiran kekangan ini turut menyebabkan kebergantungan pada bahasa Inggeris dan mengancam kelangsungan bahasa Melayu.

Teknologi di Malaysia sangat terikat pada penggunaan bahasa Inggeris yang

merupakan masalah utama untuk meluaskan lagi penggunaan bahasa Melayu dalam komunikasi teknikal dan profesional.

Ini berlaku kerana negara-negara Barat terpilih menjadi peneraju dalam kemajuan teknologi global. Di tempat tersebut, bahasa Inggeris lazimnya digunakan dalam aktiviti penyelidikan, inovasi dan penghasilan serta pengawasan pengetahuan teknikal.

Sosiolinguistik Malaysia kerap merujuk pemahaman ini sebagai *prestige language bias* yang mana bahasa Inggeris dikaitkan dengan kemajuan dan profesionalisme, sementara bahasa Melayu dianggap ketinggalan di peringkat tempatan.

Terdapat juga kajian yang menunjukkan kurangnya istilah teknikal dalam bahasa Melayu menyebabkan penggunaannya sukar diguna pakai dalam sektor teknologi.

Secara ringkasnya, dapat disimpulkan bahawa dominasi bahasa Inggeris dalam sektor swasta dan teknologi, disertai kekurangan istilah teknikal dalam bahasa Melayu, telah menyerlahkan cabaran yang dihadapi oleh Bahasa Melayu di Malaysia, sehingga merosakkan kedudukan dan penggunaan bahasa kebangsaan.

\* Nurulisyazila Othaman dan Wan Hani Nazihah Wan Muda ialah Pensyarah di Pusat Pengajian Bahasa Universiti Tun Hussein Othman Malaysia (UTHM)

**PENDAPAT**  
**Rakyat**